

CITGO Desk tey pa apoya trahadornan local

ORANJESTAD (AAN): E Citgo Desk ta e oficina cu gobierno lo establece dentro di poco na San nicolas pa asina cuminsa atende personanan cu tin interes pa traha cu un contratista den e refineria of sea cu e refineria directamente.

Recientemente Minister di Labor drs. Paul Croes a anuncia cu hunto cu su colega De Meza lo ta instalando un comision cu lo consisti di trahadornan di Departamento di labor y tambe miembronan

di Comision di Energia cu Minister de Meza pa asina recibí curriculum y interes di personanan cu lo por traha den e refineria. "Trabaonan preparatorio ya a inicia. Por medio di e email central CGinfodesk@arubagovernment.aw interesadonan pa un trabao den refineria por manda nan curriculum vitae.

Naturalmente esaki no ta un garantia cu lo bo haya un empleo como cu mester ta un funcion cu bo por eherce

y bo mester por conta cu e experiencia naturalmente. Pero sigur nos lo purba nos maximo pa hasi e contacto cu companianan relevante.

Banda di esaki e Citgo Desk lo duna nos Arubianonan cu cierto grado di experiencia un posicion mas fuerte contra cualkier trahador cu bini di afo pa trabao den refineria", minister Paul Croes a indica. Tin hopi Arubianonan den exterior cu ya caba a manda nan interes pa e mail indica, interes for di diferente paisnan



rond di mundo.

Tambe e Citgo Desk ya caba a registra mas di 150 persona interesa. Na momento cu e acuerdo final keda formalisa, trabaonan real lo inicia. Dentro di poco gobierno lo anuncia e localidad unda e Citgo Desk fisicamente lo ta situa na San Nicolas.

"Nos kier brinda un servicio adicional na nos ciudadanonan pa asina yega mas cerca di un

empleo fiho den e refineria. Colega De Meza ta trahando incansabel pa asina logra e acuerdo. Mientras tanto nos ta haciendo trabaonan preparatorio pa asina facilita cierto servicicionan pa nos comunidad", minister Paul Croes a muestra. Ta spera cu durante e prome 2 añanan na momento di un turn around e refineria lo conta cu rond di 1500 trahador.